

經萃》何異乎？

又其輯補《大誓》，以江、孫諸家所輯爲零雜，件件系不成章段，不知此正諸家之慎也。魏所輯《大誓》中下篇，舉先秦古書所引者，皆案其文義而連綴之，而有不可連綴者，則于其閒意補數語。夫先秦諸書所引果盡《大誓》中下篇之文而一無所遺乎？抑否乎？既非一無所遺，則魏所連綴者，未必本相連綴也。亦將于其閒補入己語耶？甚至云《逸周書·度邑解》，宜登諸經爲《召誥》上篇，《作雒解》宜登諸經爲《雒誥》上篇。豈有孔子刪《書》尚有棄取失當，而待後儒之補益耶？則又曰：孔子皆未見也。然則己爲博洽，而孔子爲弇陋矣。其無知妄作，于是可見。

二七一、步庶

《易辨終備》：地動山崩淪。鄭《注》：崩淪，若步庶崩者也。按：步庶，乃沙鹿之誤，此用《公羊》襲邑之說，謂沙鹿淪入地中也。彼傳自以沙鹿爲邑名，鄭借以說山耳。

二七二、傍害

《易辨終備》：傍害水凌江德潰。鄭《注》：傍，水凌貌。按：《堯典》：湯湯洪水方割，方割卽此傍害，謂洪水潰決而爲害也。下云水害滂衍字。滂滂，誼亦同。緯書猶存古義。